



Meeqqanut suli atualinngitsunut perorsaanikkut inerikkiartuutaasunik ulluunerani neqeroorutitut pissarsinissamut utaqqisarnerup qaammatinik immikkut aalajangersarneqartunik qaangerneqaqqusaajunnaarnissaa anguniarlugu, Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisaanni nr. 16, 3. december 2012-imeersumi § 5-ip allannortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Tillie Martinussen, Demokraatit)

(Siullermeerinnineq)

Demokraatit pingaartippaat nunami maani pissutsinik pitsannorsaanissaq najugaqarnissaq orniginartunngorlugu minnerunngitsumillu nunaqqatitsinnut nunami allamiikkallartunut soorlu ilinniarneq pissutigalugu angerlaqqinnissaq pilerinartuuteqqullugu.

Angajoqqaanut pingaartorujussuuvoq qitornap imaluunniit meeqqat toqqissisimasumik paarineqarsinnaanissaat, toqqissilluni sulisinnaajumalluni. Ullumikkut kommunit pisussaapput meeqqanut suli atualersimannngitsunut meeqquerivinni inissaqartitsinissaminnut. Meeqqanut suli atualinngitsunut inerikkiartuutaasunik ulluunerani neqeroorutit pillugit Inatsisartut inatsisaanni § 5-mi allassimavoq tamanna.

Taamaakkaluartuq kommunini meeqquerivinnut utaqqisoqarpoq annermik minnermilluunniit.

Kisitsisit imaapput:

- Kommune Kujalleq: Meeqqat 52 -t utaqqisut allattorsimaffianniipput
- Qaasuitsup Kommunia: Meeqqat 177 -t utaqqisut allattorsimaffianniipput
- Qeqqata Kommunia: Meeqqat 37 -t utaqqisut allattorsimaffianniipput
- Kommuneqarfik Sermersooq: Meeqqat 150-t utaqqisut allattorsimaffianniipput

Tassa imaappoq nuna tamakkerlugu meeqqat 416-t meeqquerivinnut utaqqisut allattorsimaffianniipput. Tassa meeqqat 416-nik amerlavallaartut utaqqipput.

Manna siunnersuut aqutigalugu Demokraatit sinnerlugit Inatsisartui ilaasortap Tillie Martinussenip Meeqqanut suli atualinngitsunut inerikkiartuutaasunik ulluunerani neqeroorutit pillugit Inatsisartut inatsisaanni § 5-mi allassimasut sukaterniarpai kommunit pisussaafiinut qilersonerulerlugit. Siunnersuut Demokraatini taperserparput.



Naalakkersuisut isumaqatigiinngilagut § 5-mi allassimasut tunngaviusumik isumaqarmata meeqqerivinnut utaqqisunik allattorsimasoqassanngitsoq, utaqqisutulli allatsissimasut kisitsisitaasa takutippaat kommunini piviusut allaanerusut. Taamaattumik isumaqarpugut inatsimmi § 5-p oqaasertai allanngortinneqassasut siunertaralugu kommunit pisussaaffimminnut qilersorneqarnerunissaat.

Siunnersuut innersuupparput Kulturimut, Ilinniartitaanermut, Ilisimatusarnermut Ilageeqarnermullu ataatsimiititaliamut.